

## **GARIZUMAKO I. DOMEKEA - A**

Pazkora bidean, Garizuma grazi aldi honetan,  
Bizkaiko eleizan,  
**JESUSEGAZ HOBE eta ALKARREGAZ BIDE**  
egin nahi dogu.

### **SARRERAKO OHARKIZUNA**

Egun on Jaunaren Eguna ospatzera etorri zareen guztioi.

Basamortuko esperientzia bizitzea proposatzen deusku gaur Jaunak. Garizuman Pazkora bidean goazela JESUSEGAZ HOBE egitea ibilbidea. SINODOAn txertaturik Bizkaiko elizan ALKARREGAZ egin nahi dogu bide hori.

Basamortua eremu sinbolikoa da eta hor egiten dogu bat geure buruagaz eta Jaungoikoagaz; bertan tentaldia biziaren aurre egiteko erabagia hartu daigun. Jesusek emon eban erantzuna emoteko ausardia izan daigula.

Jorratu daiguzan gizaki nortasunean sendoago egiten gaituen kristau jarrerak, eta ezkortasunetik aldendu gaitez gure hutsak astinduz.

Hasi daigun Eukaristia, abestuz.

**Dei egingo deust, nik entzungo,  
ospez jantzi ta libratuko.  
Bizi luzea nik emongo,  
salbamenera eroango.**

*<sup>2</sup>. Bere aingeruak ditu ipini zure zaindari bidean,  
zuk estropezu ez egiteko bideko harri artean.*

*<sup>4</sup>. Sortu zuk nigan bihotz garbia, ene Jainko, ni barritu;  
bialdu zeure Espiritua, nire barrua sendotu.*

### **DAMU-OTOITZA**

Senideok: damu-aldia hasi dogu, konbertsino aldian sartuta gagoz. Benetako damutasunez eskatu daiguzan Jaunaren errukia eta grazia:

—Jesus Jauna, gure erru guztiak gar**bi**tzen dituzuna.  
ERRUKI, JAUNA.

—Jesus Jauna, gudan bihotz garbi bat sortzen dozuna.  
KRISTO, ERRUKI.

—Jesus Jauna, tentaldian behin eta barriro jausten  
garanoi parkatzen deuskuzuna. ERRUKI, JAUNA.

## HITZAREN LITURGIA

### Gn 2, 7-9; 3, 1-7:

Garizumako Domeka honeetan, lehenengo irakurgaiak  
Salbamen Historiako une nagusiak gogoratuko deuskuz.  
Gaur, zero-lurrak sortzea eta gure lehen gurasoen pekatua  
aitatuko jakuz.

### Erantzun Salmoa: 50. salmoa

Gure aurrekoen eta gaurko gizon-emakumeen  
pekatuarekin badogu zerikusirik; horregaitik, abesten dogu  
damu-salmo hau.

**HAUSTERRE** Udaia'21



E - rru - ki, Jau - na, pe - ka - tu e - gin do - gu - ta

### Erm 5, 12-19:

San Paulok, bigarren irakurgaiak, Adan eta Jesukristo  
jarten deuskuz alkarren ondoan. Jesukristo da Adanen  
pekatuari Jaungoiko Aitak emon deutson erantzuna.

### Mt 4, 1-11:

Kristok, Adan barriak, pekatuaren eta txarraren aurkako  
burrukan, tentaldiak baditu. Baina ez da jausiko; tentaldiak  
garaitu egiten ditu. Goratu daigun Jauna, "Aintza, Jesus..."  
abestuz.

**Ebanjelio aurreko goralpena**

*♩ = 75*

R/. Ain - tza, Je - sus, zu - ri be - ti: Zu za - ra gu - re ar - gi.

- 1                      - 2

## JAINKO HERRIAREN OTOITZA

Senideok: "graziaren aldi" honetan, otoitz egin deiogun Jaungoiko Aitari, errukiz begiratu daigula eskatuz:

—Eleizea osotzen dogun fededun guztion alde, SINODOan esaten jakun lez Jesusen jarraipenean ALKARREGAZ BIDE egiteko gai izan gaitezela, mundu honetako tentazinoak ez gaizala kikildu, eta Ebanjelioari zor deusagun zintzotasunean iraun daigula. Egin daigun otoitz

**GARIZUMAKO ESKARIETAN**

*♩ = 80      Batek                      Danek                      Udaia'21*

E - gin dai - gun o - toitz. A - ger - tu gu - ri, Jau - na, zu - ree - rru - ki - a.

—Herriak agintaritzan eta guztien zerbitzuan jarrita daukazanen alde: baztertuen eta zapalduen egoerea aldatzen eta zuzenago egiten ahalegindu daitezala. Egin daigun otoitz

—Gizaki guztion alde, pertsona, pertsona dan lez, bere duintasuna bilatu daigula, albo batera itziaz gure arrazakeria guztiak. Egin daigun otoitz

—Eukaristian alkartuta gagozan guztion alde: garizuma honetan neurritz bizi gaitezala eta, beharrizanean dagozanei gehiago laguntzeko, beharrezkoak ez diran gastuak alboratu daiguzala. Egin daigun otoitz

Jaungoiko Aita, heldu bedi Zugana gure otoitz apala eta lagundu eiguzu gure bihotz-barruak aldatzen. Jesukristo gure Jaunaren bitartez. AMEN.

## JAUNARTZERAKO ABESTIA

- 1) **Basamortuan zehar** dabila Jainko-herria erromes; argi, bake ta maitetasuna dakarren zeruen galdez. Agindu-lurra Jainkoak deutso emongo kateen orde;

penak utzita poztu daitezana bizi barri baten pozez. R/.

**R/. Zure pozetan goaz, Jerusalem barri;  
fedea zuregan dau bere ziment-harri.  
Maitasunak zu zaitu bere berogarri.  
Biztu itxaropena zure herriari.**

2) Israel barri kurutzearen ondoren doa bidari;  
bide iluna argitutzeko hodeia dauka gidari.  
Zerua dau hark, Kristok agindu, erreinu eta lur barri;  
beronek deutsoz oinak sendotzen Jainko-herri barriari.  
R/.

3) Herriak euren minaren minez dagoz ezin-egonetan;  
bake, poz, argi, egia eta maitetasun bilaketan.  
Entzun zuk hareen negar antsia, eutsi bideko nekeetan,  
larri dabilz-ta zure etxe-bila fedearen urratsetan. R/.

**Jaungoikoaren hegoenpean:** ze bakean! (2)

Indar guztiak dituenaren kerizpean (2).

Jauna, nik dinot: "Nire kerizpe dot zuregan;  
bihotz guztiaz nago Jaunaren eskuetan."

*Zugana ez da hurreratuko zoritxarrik;  
zure aterpera ez da etorriko izurrik.*

## **AZKEN AGURRA**

Senideok: Jaungoikoaren Berbea entzun dogu eta  
Kristoren mahaian parte hartu dogu. Aste barruan zehar,  
gogoan izan daigula Garizumako ibilbidean gagozala eta  
Kristoren antzeko gizon-emakume barriak izaten ahalegindu  
gaitezala.

R/. **Zure aurpegi bila** gabilta gu, Jauna,  
zu zaitugu argi eta salbamen,  
zu, Jauna, biziaren babes.

